

Yn yr hinsawdd economaidd fyd-eang sydd ohoni mae cyfraniadau masnach a chymorth ar gyfer datblygu dan bwysau. Mae David Burtenshaw yn cyfeirio at y ffaith mai nawr, yn fwy nag erioed o'r blaen, y dylai daearyddwyr gymryd cam yn ôl i ystyried effeithiau'r naill a'r llall.

Ai masnach neu cymorth sy'n cau'r bwlch?



TopFoto/ImageWorks



TopFoto/keystone

Bu dadlau ynghylch cyfraniadau cymharol masnach a chymorth tuag at gaw bwlch datblygiad er Adroddiad Brandt yn 1980.

Masnach


Masnach yw sylfaen creu cyfoeth a datblygiad economaidd a chymdeithasol. Mae'n dod â chystadleuaeth i farchnadoedd cartref. Cysylltir cynnydd mewn masnach â thwf mwy, gwell ansawdd bywyd a gostyngiad mewn tlodi. Fodd bynnag, mae masnach yn parhau i ogwyddo tuag at y byd datblygedig. Eto, mae'r twf cryfaf o ran masnach yng ngwledydd BRIC (Brasil, Rwsia, India a China), gwledydd incwm-canolig fel Gwlad Pwyl a rhai gwledydd incwm-isel fel Viet Nam. Gwelodd y 48 economi tlotaf eu masnach yn aros yn ei unfan. Mae tua 75% o fasnach y byd yn digwydd mewn gweithgynhyrchion a gwasanaethau rhwng economïau datblygedig. Mae masnach o Affrica, i'r de o'r Sahara, yn cynrychioli 1.3% yn unig o fasnach y byd ac yn cynnwys cynhyrchion cynradd yn bennaf. Mae Ffigurau 1 a 2 yn dangos llifoedd masnach ar gyfer Ewrop ac Affrica sy'n tanlinellu hyn. Ac eto, roedd Cynhadledd Monterrey ar Ariannu Datblygiad 2002 yn pwysleisio'r syniad 'Masnach nid Cymorth' ('Trade not Aid'). Mae Nod 8 a Thargedau 12-18 Datblygu'r Mileniwm i gyd yn canolbwyntio ar fasnach.

Pam nad yw masnach yn cynorthwyo datblygiad ym mhob rhan o Affrica?


Yr elfennau sy'n rhwystro mwy o fasnachu yw:

- (i) tollau, yn arbennig pan fydd nwyddau'n cael eu cludo i, neu o, wledydd tirgaeedig;
- (ii) isadeiledd dynol gwael fel oediadau ar ffiniau, sy'n achosi gostyngiad o 4% yn y gwerth allforio;
- (iii) tanfuddsoddi mewn isadeileddau ffisegol gyda'r canlyniad fod nwyddau darvoudus fel cynhyrchion ffermydd yn gallu colli 6% o'u gwerth bob dydd o ganlyniad i gludiant araf; a
- (iv) costau cludiant i wledydd tirgaeedig Affrica, sydd 55% yn uwch na rhai gwledydd arfordirol.

Golyga hyn fod y costau yn uwch i wledydd tirgaeedig (mae costau cludo mewnforion yn cynrychioli 25% o'r gwerth yn Mali) a CMC (cynnyrch mewnwladol crynswth) is y pen (\$UDA 680 ar gyfer gwledydd tirgaeedig Affrica o'i gymharu â \$UDA 1768 ar gyfer y gwledydd arfordirol). Mae'r Indecs Galluogi Masnach (*The Enabling Trade Index*) yn seiliedig ar fynediad i'r farchnad, gweinyddu ar y ffin, costau cludiant a chyfathrebu a'r amgylchedd busnes mewn 118 gwlad (Tabl 1). Dim ond De Affrica (58) a Morocco (74) sydd ymhlith



Ffigur 1 Llifioedd masnachol ar gyfer Ewrop, 2004
(trwch y saeth mewn cyfrannedd â maint masnach)



Ffigur 2 Llifioedd masnach ar gyfer Affrica, 2004
(trwch y saeth mewn cyfrannedd â maint masnach)

y 75 uchaf. O'r 20 gwlad sydd â'r manteision isaf, mae 12 yn rhai Affricanaidd: mae gan Tchad indecs o 2.6 a Burundi 2.7 – mae'r ddwy wlad yn rhai tirgaeedig.

MATHAU O GYMORTH

Ceir gwahanol fathau o gymorth.

- Mae *cymorth bwyd a chymorth trychinebau* yn ffyrdd o ymateb yn ddi-oed i angen. Mae 12% o gymorth dwyochrog yn y ffurf hon. Weithiau mae cymorth bwyd yn gymorth tymor hir. Roedd cymorth i Eldoret yn Kenya ar ôl y terfysgoedd yn dilyn etholiad 2008 ar ffurf cymorth bwyd. Mae cyrff anllywodraethol (NGOs) yn flaenllaw yma.
- Mae *cymorth dwyochrog* yn llifo rhwng gwledydd i ariannu projectau sydd fel arfer o fudd i'r rhoddwyr oherwydd bydd yn ddibynnol ar yr arbenigedd y byddant yn ei gyflenwi. Mae llawer o'r arian yn dychwelyd i'r wlad sy'n rhoi. Mae tua 75% o gymorth yn y ffurf hon.
- Mae *cymorth amlochrog* yn gymorth a ddaw o amrywiaeth o ffynonellau a reolir fel arfer gan asiantaethau byd-eang fel Banc y Byd.
- Mae *cymorth rhaglen* yn cefnogi buddsoddiadau allweddol fel llawer o'r cynlluniau mawr i godi argaeau. Mae Credyd Cymorth i Leihau Tlodi, Banc y Byd yn gynllun o'r fath, ac mae'n cefnogi darparu cyffur gwrth-retrofirol yn Moçambique.
- Mae *cymorth cyfyngedig* yn clymu'r derbynnydd i'r wlad sy'n rhoi, yn arbennig pan yw'r wlad honno yn dymuno elwa mewn ffordd benodol, er enghraifft, cymorth China yn Sudan ac yn Zambia.
- Mae *cymorth anghyfyngedig* yn rhoi dewis i'r derbynnydd.
- Mae *rhyddhad dyledion* yn fath o gymorth oherwydd mae'n dileu'r taliadau llog sy'n ddyledus. Fe'i defnyddir i ysgafnhau baich dyledion gwledydd sy'n ad-dalu benthyciadau ond sy'n gweld y symiau dyledus yn cynyddu er gwaetha'r ad-daliadau. Cynyddodd hyn bedair gwaith o 7% o Gymorth Datblygiad Swyddogol (ODA) yn 2001 i 30% yn 2005. Rhwng 1992 a 2001 roedd cyfanswm y ddarpariaeth ar gyfer rhyddhad dyledion 7% yn unig yn fwy na ODA mewn un flwyddyn, sef 1998, pan oedd yn 9%. Mewn termau absoliwt, roedd tua 60% o'r cynnydd mewn ODA rhwng 2004 a 2005 ar gyfer rhyddhad dyledion. Anogodd Cynhadledd Monterrey 2002 y gwledydd sy'n rhoi i sicrhau na fyddai adnoddau a ddarparwyd ar gyfer rhyddhad dyledion yn tynnu oddi ar adnoddau ODA a fwriadwyd ar gyfer datblygiad. Yn wir, defnyddiwyd rhyddhad dyledion ar gyfer cymorth trychinebau yn Indonesia a Pakistan yn 2005.
- Mae *dyngarwch a chyfraniadau preifat* yn ffurfiau ar gymorth, fel

y Gates Foundation a sefydlwyd gan sylfaenydd Microsoft. Mae dyngarwch enwogion yn cael ei hybu gan bobl fel Bob Geldof a Bono ac yn cael ei gopïo yn China, India a Malaysia. Yma hefyd dylid cynnwys *dyngarwch crefyddol*.

Taliadau yw'r symiau a anfonir yn ôl gan fudwyr cyfreithlon ac anghyfreithlon i'w mamwledydd, e.e. arian o Dubai i Pakistan neu o UDA i Mèxico.

Yn Nhabl 1 dangosir rhoddwyr cymorth a restrir yn ôl canran yr incwm gwladol crynswth (GNI) a roddir fel cymorth. Mae Indecs Ansawdd Cymorth Roodman yn rhoi persbectif arall sy'n cynnwys ffactorau goddrychol: ansawdd y drefn lywodraethol, tlodi, cosbi cymorth cyfyngedig, gwneud darpariaeth ar gyfer ôl-lifioedd yn gwasanaethu dyled, projectau bychain a lledaeniad projectau, a gwobrwyo polisiau trethi i annog rhoddion elusennol preifat. Dim ond UDA, Awstria, y Ffindir a Sweden a gefnogodd yr olaf yn 2004.

YMRWYMIADAU DIFFYGIOL

Cytunodd uwchgynhadledd y G8 yn Gleneagles yn 2005 i gynyddu ODA i 0.7% o incwm gwladol crynswth (GNI) ac eto yn 2006 a 2007 gostyngodd y canran 15%. Mae hyn wedi digwydd ar ôl pob cynhadledd genedlaethol bwysig. Disgynnodd canran cynnyrch gwladol crynswth (GDP) y gwledydd datblygedig a glustnodwyd ar gyfer ODA yn 1993, yn dilyn Uwchgynhadledd Rio. Ymrwymodd y gwledydd datblygedig o ddifrif i gynyddu ODA, ac yna mynd ati i'w leihau. Dywedodd y G77, sy'n cynrychioli'r gwledydd sy'n datblygu, bod effeithiolrwydd cymorth yn ddibynnol ar ffactorau fel cyfradd y berchenogaeth genedlaethol a lleol, ansawdd polisiau cartref ac i ba raddau mae'r ODA yn ymateb i amcanion polisiau cartref. Sylweddolodd Cynhadledd Monterrey fod effeithiolrwydd cymorth yn cael ei beryglu gan amodau beichus a orfodwyd gan y rhoddwyr. Amodau fel cyfyngu cymorth a chan ddiffyg cytgord yn amodau a gweithdrefnau gweithredol y gwledydd sy'n rhoi, gan gynnwys sefydliadau amlochrog.

CYMORTH AR GYFER MASNACH

Ers Adroddiad Brundtland 1987, mae'r pwyslais wedi bod ar y ffaith fod cymorth yn gynaliadwy ac yn cael ei gysylltu â datblygiad masnach. Mae cymorth ar gyfer cynlluniau masnach deg wedi cynorthwyo yn hyn o beth. Fodd bynnag, mae perygl y bydd

cymorth ar gyfer masnach yn cael ei ddefnyddio i wrthweithio colledion o ganlyniad i ddirywiad mewn telerau masnachu. Dau syniad a gyflwynwyd i liniaru rhai o'r materion yw gosod treth ar bob symudiad ariannol dros ffiniau (Treth Tobin ar lifoedd ariannol rhyngwladol) a diddymu dyledion (a gynigwyd gan Jiwibili 2000).

CASGLIAD

Nid yw masnach na chymorth wedi datrys problemau gwledydd sy'n datblygu. Gan wleidyddiaeth fyd-eang y mae'r ateb i wneud masnach a chymorth yn fwy llwyddiannus.

“Ein bwriad yw cynyddu cyfleoedd i bobl mewn gwledydd sy'n datblygu i oresgyn newyn a thlodi.”

www.gatesfoundation.org

Gwlad yn ôl % GNI 2008	\$UDA (miliynau)	ODA 2008		Indecs Ansawdd Cymorth Roodman 2004	Indecs Rhoddion Preifat, Canolfan Ffyniant Byd-eang 2007 \$UDA biliwn	Indecs Galluogi Masnach 2008 (safle)
		% o GNI (targeted 0.7% y CU)	% o duedd GNI 2005-2008			
Sweden	4508	0.98	+0.04	0.5	0.10	5.71(3)
Luxembourg	382	0.92	+0.13	dim data	0.02	5.5(12)
Norwy	3638	0.88	-0.06	0.4	0.25	5.65(4)
Denmarc	2570	0.82	+0.01	0.48	0.09	5.62(6)
Yr Iseldiroedd	6522	0.8	-0.02	0.45	0.95	5.51(11)
Iwerddon	1192	0.58	+0.16	0.12	0.32	5.2(20)
Gwlad Belg	2214	0.47	-0.06	0.21	0.34	5.21(18)
Y Ffindir	981	0.43	-0.03	0.19	0.06	5.61(7)
Sbaen	6138	0.43	+0.16	0.07	0.36	5.03(22)
DU	12,217	0.43	-0.04	0.19	4.12	5.3(16)
Awstria	1555	0.42	-0.10	0.15	0.12	5.42(15)
Y Swistir	1794	0.41	-0.03	0.21	0.50	5.58(9)
Ffrainc	10,168	0.39	-0.08	0.23	1.03	5.2(19)
Yr Almaen	12,994	0.38	+0.02	0.15	1.27	5.58(8)
Awstralia	3038	0.34	+0.09	0.11	0.66	5.22(17)
Canada	4577	0.32	-0.02	0.14	1.36	5.62(5)
Seland Newydd	355	0.3	+0.03	0.03	0.09	5.52(10)
Portiwgal	471	0.27	+0.06	0.1	0.03	4.48(26)
Yr Eidal	4059	0.2	+0.03	0.11	0.06	4.7(33)
Japan	7679	0.18	-0.10	0.09	0.45	5.43(13)
UDA	25,439	0.18	-0.05	0.07	36.90	5.42(14)

Ffynhonnell: OECD Development Statistics Online

GNI = Inwm Gwladol Crynswth/Gross National Income

ODA = Cymorth Datblygiad Swyddogol/Official Development Assistance

ADOLYGIAD

Pwyntiau allweddol

- Hyd yma nid yw masnach wedi galluogi datblygiad yn y byd sy'n datblygu. Y byd datblygedig sydd wedi elwa arno.
- Mae llawer o rwystrau yn llesteirio masnach sy'n datblygu.
- Mae gwahanol fathau o gymorth.
- Nid yw'r rhan fwyaf o fathau o gymorth yn atebion delfrydol i broblemau gwledydd sy'n datblygu.
- Mae'r gwledydd sy'n rhoi yn dal heb gyflawni eu hymrwymiaadau.

Munud i feddwl

- A yw problemau masnach a chymorth yn rhai gwleidyddol?
- Sut all y gwledydd sydd newydd eu diwydianeiddio (NICs) a gwledydd BRIC gyfrannu at leihau'r bwlch datblygiad?
- A fydd y byd bob amser yn anghyfartal?
- Er mai llifoedd ar gyfer 2004 sydd ar y mapiau, ychydig iawn ar y cyfan fydd llifoedd masnach wedi newid ers hynny. Mae Banc y Byd yn parhau i ddefnyddio mapiau cyn y wasgfa gredyd. Bydd y wasgfa gredyd wedi gostwng meintiau masnach, a bydd hyn wedi arwain at gulhau trwch llinellau'r llifoedd ond heb newid y patrwm cyffredinol. Ydych chi'n cytuno?
- Gwnaed addewidion newydd yn Uwchgynhadledd y G8 yn L'Aquila ym mis Gorffennaf 2009. A yw'r rhain yn debygol o gael eu gwireddu?
- Mae China wedi dod yn brif bartner masnachu Affrica ar ôl America; mae masnach rhwng Affrica a China wedi chwyddo o ychydig dros \$UDA 6.5 biliwn yn 1999 i \$UDA 107 biliwn yn 2008. Yn 2009 cynigodd China werth \$UDA 950 miliwn o gymorth i Zimbabwe a chaiff ei ddyfynnu yn dweud 'rydym am aros yn y wlad'. Pa fuddsoddiadau eraill a wnaeth China yn Affrica?

Cyd-destun

- Mae'r erthygl hon yn edrych yn fanwl ar y ddadl sy'n parhau ynglŷn â rhinweddau masnach neu gymorth fel y ffordd orau o sicrhau datblygiad.
- Mae'n dangos sut y gallai cyrff rhyngwladol a gwleidyddion gynnig atebion gwahanol.
- Mae'r bwlch datblygiad yn parhau i fodoli ac efallai ei fod yn cynyddu.
- Bydd lleihau'r bwlch datblygiad yn dod yn fwy anodd o ganlyniad i arafiad economaidd byd-eang.

YMATEB

Cymathiad

- 1 Beth yw'r prif wahaniaethau rhwng mapiau patrymau masnach Ewrop ac Affrica yn 2004? Sut y gallai'r patrymau hyn fod wedi newid erbyn 2009?
- 2 Pam y mae gwledydd tirgaeedig yn Affrica dan anfantais?
- 3 Allwch chi enwi Nodau Datblygu'r Mileniwm?
- 4 Beth yw NGOs?
- 5 Pam y mae llawer o bobl yn credu bod gwledydd datblygedig wedi methu yn eu hymrwymiaadau i estyn cymorth?

Gwerthusiad

- 1 Astudiwch Dabl 1. Dadansoddwch a chynigwch eglurhad am batrymau ODA, ansawdd cymorth a rhoddion preifat.

Cynllun ateb

 - Y pwynt allweddol yw fod yr indecsau yn gosod gwledydd mewn gwahanol sefyllfaoedd oherwydd bod y dulliau o fesur yn seiliedig ar wahanol feini prawf.
 - Mae polisïau cymorth rhai gwledydd yn eu gosod yn uchel ar lawer o indecsau – mae gwledydd Llychlyn yn amlwg iawn.
 - Mae maint economi'r Unol Daleithiau yn golygu bod y wlad â'r ODA mwyaf yn ogystal â'r rhoddion preifat mwyaf. Mae Ffrainc, yr Almaen a'r DU yn rhoddwyr preifat pwysig.
 - Awgryma newidiadau ers 2005 fod dirwasgiad yn effeithio ar lawer o wledydd. Mae pleidiau llywodraethol wedi gorfod ffrwyno gwariant – mae cymorth yn darged hawdd. Roedd Japan mewn cyfnod o ddirwasgiad drwy'r cyfnod.
 - Gall esboniadau ganolbwyntio ar bolisiau cenedlaethol tuag at ddatblygiad fel yn Llychlyn a'r Iseldiroedd, cysylltiadau trefedigaethol (y DU, Ffrainc, Portiwgal), cyfoeth economaidd.
- 2 Pam y mae cymaint o wledydd yn parhau i fethu rhoi 0.7% o GNI i ODA?
- 3 Ym mha ffyrdd y gall rhyddhad dyledion rwystro a chynorthwyo datblygiad?

Estyniad

- 1 Ai proses wleidyddol yn unig yw'r ateb i'r bwlch datblygiad?
- 2 Pam nad yw cymorth yn llwyddo i liniaru tlodi a lleihau'r bwlch datblygiad?
- 3 Drwy gyfeirio at un wlad, dangoswch sut y mae elfennau'r Indecs Galluogi Masnach yn cyfyngu masnach a datblygiad.
- 4 Os hoffech ragor o fanylion am fasnach, rhowch gynnig ar yr adnoddau canlynol: *The Global Enabling Trade Report 2008* Fforwm Economaidd y Byd. Mae hwn yn bwrw golwg fanwl ar yr elfennau sy'n rhwystro masnach; *The Index of Global Philanthropy and Remittances 2009* gan y Ganolfan Ffyniant Byd-eang (*Centre for Global Prosperity*). Mae hwn yn edrych ar roddion a thaliadau preifat o safbwynt UDA; ac mae *the World Development Report 2009: Reshaping Economic Geography* Banc y Byd yn adnodd rhagorol arall.